

## Morning Regional Dogri News Bulletin, 24<sup>th</sup> October 2024

मार्निंग डोगरी न्यूज़ बुलेटिन, समें. 09-20 Hrs

<><><><><><>

### Headlines

1. मुखमन्त्री उमर अब्दुल्ला होरें कल नमीं दिल्ली च केन्द्री गृहमन्त्री अमित शाह हुंदे नै मलाटी कीती।
2. जम्मू कश्मीर पुलसै गांदरबल च होए दे आतंकी हमले च शामिल 2 विदेशी आतंकवादिएं दे फाटू जारी कीते न।
3. जर्मनी दे चांसलर ओलाफ शोलज होर 7में अंतरसरकारी परामर्श लेई अज्ज भारत आवा करदे न।
4. क्रिकेट च त्रै टैस्ट मैचें दी मजूदा श्रृंखला दे दुए टैस्ट मैच च अज्ज पुणे च भारत ते न्यूजीलैंड दियां टीमां आमने सामने होंगन।

<><><><><><>

### Amit Shah Omar

मुखमन्त्री ओमर अब्दुल्ला होरें कल केन्द्री गृह मन्त्री अमित शाह हुंदे'नै मलाटी करियै केन्द्र शासित प्रदेश कन्नै सरबंघत बक्ख-बक्ख मामलें पर चर्चा कीती जिंदे च तौले राज्य दा दर्जा ब्हाल करने दा मामला बी शामिल हा। मुखमन्त्री दा औहद्धा सांभने परैन्त ओमर हुंदा एह नमीं दिल्ली दा पैह्ला-पैह्ला दौरा ऐ। मगरा उनें आखेआ जे ओह शिष्टाचार दे नाते गृह मन्त्री हुंदे'नै मिले ते प्रदेश दी स्थिति बारै उनें'गी जानकारी दित्ती। हासल रिपोर्टें मुजब मुखमन्त्री ओमर अब्दुल्ला होरें राज्य दा दर्जा ब्हाल करने दे मामले पर बी चर्चा कीती ऐ। दिल्ली दे अपने दौरे दरान मेद ऐ जे ओमर होर प्रधानमन्त्री नरेन्द्र मोदी हुंदे कन्नै बी मलाटी करडन। उंदा एह दौरा गांदर जिले दे गगनगीर इलाके च होए दे आतंकवादी हमले दी पच्छोकडै च लगा करदा ऐ जेह्दे च आतंकवादिएं 7 बेदोसे लोकें दी हत्तेआ करी दित्ती ही। 2019 च जम्मू-कश्मीर गी केन्द्र शासित प्रदेश च तब्दील करने दे बाद थमां गै पुलस बल केन्द्री गृह मंत्रालय दे अधिकार हेठ ऐ। मुखमन्त्री हुंदी प्रधानता तैहत पिछले दिनें लाई गेदी मंत्रिमंडल दी बैठका दरान इक प्रस्ताऽ पास करियै केन्द्र सरकार गी एह गुजारिश कीती गई जे जम्मू-कश्मीर दा राज्य दा दर्जा ब्हाल कीता जा। लेफ्टिनेंट गवर्नर मनोज सिन्हा होरें बी इस प्रस्ताऽ गी मंजूरी दित्ती ही।

<><><><><><>

## JK- Terrorist

जम्मू कश्मीर पुलस नै गांदरबल जिले च ऐतवारें होए दे आतंकवादी हमले च शामिल विदेशी आतंकवादिएं दे फोटू जारी कीते न। उह फोटू सीसीटीवी कैमरें दी रिकार्डिंग दे आधार पर तैआर कीतियां गेइयां न। पुलस नै आखेआ हा जे 2 विदेशी आतंकवादी गगनगीर इलाके च कम्मगारें दे शिविर च दाखल होए ते अन्नबाह गोलियां चलाइयां। इस हमले च 7 लोक मारे गे जेहदे च इक मकामी डाक्टर ते 6 घाटी थमां बाहरा आइयै उत्थें कम्म करा'रदे लोक हे। इस आतंकवादी हमले दे सरबंधै च अजें तगर 40 शा बद्ध लोकें शा पुच्छ—गिच्छ कीती गेई ऐ। एनआईए दी टीम नै बी घटना आली थाहरा दा दौरा लाया ते किश सबूत किट्टे कीते।

<><><><><><>

## Dy CM Industries

उपमुख्यमंत्री सुरिन्द्र कुमार चौधरी होरें जम्मू कश्मीर दे लोकें लेई रोजगार दे मौके पैदा करने ते आर्थिक विकास जकीनी बनाने लेई उद्योगें सरबंधी खेत्तर च नमीं जान भरने दी जरूरते पर जोर पाया ऐ। मंत्री होरें एह गल्ल कल श्रीनगर सिवलि सचिवालय च उद्योगें सरबंधी खेत्तर च जायजा लैंदे होई आक्खी। उनें आर्थिक विकास ते कम्म रोजगार दे मौके पैदा करने च इस खेत्तर दी बड़ी मती समर्थ पर लोह पाई। उनें आखेआ जे उद्योगें दे विकास गी बढ़ावा देने लेई नमहं रणनहति गी अमले च आंदा जाना लोड़चदा ऐ। उनें इब्बी आखेआ जेकर एह खेत्ती तगड़ा बनोग तां जम्मू कश्मीर दी जीडीपी च एहदे योगदान च बी खरा मता बाद्धा दिखने गी लब्भोग। उपमुख्यमंत्री होरें अधिकारिएं गी निर्देश दित्ते जे ओह सुधार दी गुंजाइश आले खेत्तरें दी पंछान करन तां जे नीतिएं गीमते असरदार ढंगै कन्नै लागू कीता जाई सकै।

<><><><><><>

## CS-NCORD

मुख्य सचिव अटल डुल्लू होर कनून नाफिस करने आली अजेंसिएं पर जोर पाया ऐ जे ओह एनडीपीएस आले मामलें तैहत जमानत आली हुक्म दा बरोध करने लेई कनूनी प्रावधानें दा लाह ठोआन तां जे निक्की हारी सजा भुगतने परैंत दोशिएं गी खुल्ले नेई घुम्नन दित्ता जा। कल लाई गेदी प्रदेश स्तर दी NCORD कमेटी दी 11मीं बैठक दी प्रधानता करदे होई मुख्य सचिव होरें अफसरें गी आखेआ जे अदालतै च चलान पेश करने ते हर मामले च तगड़ी जांच करने च कोई ढिल्ल—मट्ठ नेई बरतन। उनें दवाइए दे कारोबार कन्नै जुड़े दे इदारें गी सीसीटीवी कैमरें लाने ते बिलें आली कम्प्यूट्रीकृत प्रणाली दे इस्तेमाल लेई निर्देश देने लेई बी आखेआ। उनें आखेआ जे खास तौर पर शैहरी इलाकें च कुसै बी फारमेसी गी इनें सुविधाएं दे बगैर नेई चलन दित्ता जाग।

<><><><><><>

## Officers Jammu

जम्मू कश्मीर सरकारै सब्बने प्रशासनिक सचिवें ते बक्ख-बक्ख मैह्कमें दे प्रदेश स्तर दे प्रमुखें गी हुक्म दित्ता ऐ जे ओह्औंदी 11 नवम्बर थमां जम्मू आले सिविल सचिवालय च अपनी हाजरी जकीनी बनान। हुक्म च इब्बी आखेआ गेआ ऐ जे कम्मकाज दिएं जरूरतें स्हाबै एह् अधिकारी श्रीनगर सचिवालय च बी अपनी हाजरी जकीनी बनागंन।

<><><><><><>

## Govt. Patel

सरकार नै सरदार पटेल हुंदी 150मीं जयंति सरबंधी समारोह् मुख्य भरै च 2 ब'रे तोड़ी मनाने दा फैसला कीता ऐ। एह् समारोह् इस ब'रे थमां शुरू होआ'रदे न। एह् फैसला सरदार पटेल हुंदे योगदान गी दिखदे होई लैता गेआ ऐ। केन्द्रीय गृहमंत्री अमित शाह होरें आखेआ जे इस समारोह् गी सरदार पटेल हुंदी उपलब्धिएं ते भारत दी एकता दी भावना दे चेते दे तौर पर मनाया जा'रदा ऐ। सरदार पटेल हुंदे योगदान गी चेता करदे होई शाह होरें आखेआ जे दुनिया दे सब्बने थमां मजबूत लोकतंत्र गी स्थापत करने च उनें अहम भूमका नभाई। उनें कश्मीर थमां लक्ष्यद्वीप तोड़ी भारत गी अखंड बनाया।

<><><><><><>

ते हुन बाकि दिएं खबरें कन्नै श्रुति खजूरिया।

<><><><><><>

## Germany- Chancelor

जर्मनी दे चांसलर ओलाफ शोलज अंतरसरकारी परामर्ष आईजीसी दी 7मीं बैठक च हिस्सा लैने लेई अज्जै थमां त्रऊं दिनें दे भारत दौरे पर रौहगन। प्रधानमंत्री नरेन्द्र मोदी ते शोलज होर कल आईजीसी दी बैठक दी सांझै तौरा पर अध्यक्षता करगंन। आईजीसी इक महत्वपूर्ण सरकारी मंच ऐ जेह्दे तैह्त दौनें पक्खें दे मंत्री अपने मतेहत क्षेत्रें सरबंधी मुद्दें पर सोच बचार करदे न ते एह्दी रिपोर्ट प्रधानमंत्री ते चांसलर गी दिंदे न। दवै नेता कल सुरक्षा ते रक्षा सैह्योग, नेड़मे आर्थिक सैह्योग, उभरदी ते रणनीतिक प्रौद्योगिकी दे क्षेत्र च हरित ते सतत विकास सांझेदारी ते सैह्योग पर चर्चा करगंन। दवै नेता जर्मन ववसाय दे 18में एशिया प्रशांत सम्मेलन गी बी संबोधत करगंन।

<><><><><><>

## PM- Arrival

प्रधानमंत्री नरेन्द्र मोदी होर रूस दे कजान च ब्रिक्स शिखर सम्मेलन च हिस्सा लेने दे बाद जंदी चिरें रातीं नमीं दिल्ली परतोई आए न। अपने दौरे दरान उन्हें शिखर सम्मेलन दे बाहरे, चीन दे राष्ट्रपति शी जिचपिंग, रूसी राष्ट्रपति ब्लादिमीर पुतिन ते नमें चुने गेदे ईरानी राष्ट्रपति मसूद पेजेश किआन हुंदे नै दपक्खी बैठकां बी लाइयां। एहदे इलावा प्रधानमंत्री मोदी होरें उजबेकिस्तान दे राष्ट्रपति शवकत मिरजी योथेव ते संयुक्त अरब अमिरात दे राष्ट्रपति शेख मोहम्मद बिन जायेद अल निहान हुंदे नै बी बैठक कीती।

<><><><><><>

## PM-MKB

प्रधानमंत्री नरेन्द्र मोदी होर इस म्हीने दी 27 तरीक गी आकाशवाणी पर प्रसारत होने आले कार्यक्रम मन की बात राएं अपने बचार लोकें कन्नै सांझा करगन। एह इस कार्यक्रम दी 115मीं कड़ी होग। लोक इस कार्यक्रम लेई अपने बचार ते सुझाह टोल फ्री नंबर 1800-11-7800 पर सांझा करी सकदे न। लोक नमो ऐप जा फही My Gov Open Forum पर जाइयै बी अपने बचार ते सुझाह सांझा करी सकदे न। एह सुझाह इस म्हीने दी 25 तरीक तगर दित्ते जाइ सकदे न। एह कार्यक्रम आकाशवाणी ते दूरदर्शन दे समूलचे नेटवर्क AIR News ते न्यूज ऑन एयर मोबाइल ऐप पर बी प्रसारत कीता जाग। इस कार्यक्रम दा लाइव प्रसारण एयर न्यूज, डी डी न्यूज, प्रधानमंत्री हुंदे दफतर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी हिंदी प्रसारण दे फौरत मगरा इस कार्यक्रम दा क्षेत्रीय भाषाएं च बी प्रसारण करोग।

<><><><><><>

## Paddar Mishap

किश्तवाड़ जिले दे पाड्डर इलाके च कल होए दे इक शिड़क हादसे च 2 जनें दी मौत ते 6 होर जनें जख्मी होइ गे। आकाशवाणी दे किश्तवाड़ जिला संवाददाता कैलाश नाथ दी रिपोर्ट मूजब इक टैक्सी जिले दे गुलाबगढ़ इलाके च चसोटी-पाड्डर शिड़कै पर इक डूहंगी खड्डै च जाई डिग्गी, जिस करी 2 जनें दी मौत ते 6 जनें जख्मी होई गे। मरने आलें दी पंछान चसोटी दे बसनीक अक्षय कुमार ते बंसी लाल दे तौर पर कीती गई ऐ। हादसे च जख्मी होए दे लोकें गी अथोली आले उप-जिला अस्पताल च भर्ती करोआया गेदा ऐ।

<><><><><><>

## Fire Crackers

प्रशासन नै अखनूर स्थित पटाखें दे 2 गोदामें गी सील करी दित्ता ऐ। एसडीएम हुंदी अगुवाई च जांच कीती गई। इस दरान पता लगा जे एह लोक सुरक्षा सरबंधी तौर तरीके गी नेई अपना 'रदे हे। एसडीएम अखनूर हुंदी अगुवाई व?च कमेटी नै अम्बारन ते सुंगल मोड़ थाहर गौदामें दी जांच कीती ते इनें दौनें थाहरें लोड़चदे सुरक्षा सरबंधी हीले नेई कीते गेदे हे।

<><><><><><>

Cricket

भारत ते न्यूजीलैंड बश्कार मजूदा त्रै टैस्ट मैचें दी श्रृंखला दा दूआ मैच अज्ज पुणे दे महाराष्ट्र क्रिकेट एसोसिएशन स्टेडियम च बडलै साढ़े 9 बजे शुरू होग। पिछले 10 ब'रे कोला बी मते समें थमां घरेलू पिच पर कोई बी टैस्ट श्रृंखला नेई हारने आले भारत गी बैंगलुरु च खेड़डे गेदे इस श्रृंखला दे पैहले मैच च जबरदास्त झटका लग्गे दा ऐ जिसलै महमान टीम दे हत्था 8 विकटें दी हार दा सामना करना पेआ हा ते इस दुए टैस्ट च जित्त हासल करियै भारत श्रृंखला गी बराबरी पर लेई आहनने दी पूरी कोश्ट करोग।

<><><><><><>